

223916

唐
確
慎
集

中華書局印行



唐確慎公集

四部備要

集部

上海中華書局據原刻本

校刊

桐鄉 陸費達總勘

杭縣 高時顯輯校

杭縣 吳汝霖校
丁輔之監造

版權所有不許翻印

序

余嘉慶丁卯歲與鏡海先生同舉於鄉以文章相切磨嗣先生官翰林余貽書詢以文選之學先生復書謂文辭不足爲學余與令兄藕耕近究心於朱子近思錄及薛文清讀書錄以自治其身心求寡過而已余於是始知先生用功之深而余之知有切己之學也亦自是始夫學術至今日而益裂矣其高焉者空談心性而不求諸實用其卑焉者溺於訓詁考據斷斷於一名一物之微又其下者剽竊詞章以圖倖進而皆置身心於不問故其出而臨民也鹵莽滅裂以利祿爲心而民物不被其澤先生心焉傷之兢兢焉奉程朱爲的主敬以立其體忠恕以致其用非有裨於身心意知之理者不以關其慮也非有關於天下國家之故者不以用其功也考之於己而不求知於人反之於心而惟一順乎理故其見諸政事者相其土宜以謀其生聚因其本明以除其錮蔽區畫於日用飲食之細以誘致於孝弟忠信之良秀者服其教而頑者從其令使後世之民得沐先王至治之澤也豈非真儒之效與先生不欲以文見而其闡經義之微言道身心之自得覺凡民之聾瞶謀閭里之安全人之讀之者要皆如布帛菽粟而各得其所適焉此周程張朱之文無意爲文而爲古今之至文也余與先生交三十餘年矣不鄙淺陋而命序其文因道其所窺見者於此

道光二十年秋七月年姻愚弟善化賀熙齡拜譔

曾文正公代遞遺摺原奏

為據情代遞遺摺仰祈

聖鑑事竊臣於四月十三日據原任太常寺卿唐

鑑之子唐爾藻具呈到營稱其父唐鑑於正月十八日病故年八十四歲臨沒時諄囑我以無位之人仰荷

聖主恩遇最深今當永訣謹具遺摺以鳴戀

主之忱惟籍隸山東寄居湖南求人代奏均多未便往年出京時曾奉

諭旨仍回江南此摺應交兩江督臣代為遞奏理

合專丁赴營呈請代奏等情並將正摺及草

稿資送前來臣查二品卿銜前任太常寺卿

唐鑑由翰林院檢討歷官至江南布政使內

轉太常寺卿年老致仕主講江南鍾山書院

咸豐元年奉

旨進京

召見十五次

皇上特旨褒嘉以唐鑑品學兼優器識安定

賞給二品卿銜

諭令回南主講書院咸豐二年粵匪竄擾湖南唐

鑑念切廬墓於三年正月回湘服官三十餘

年父子皆位至藩司而家無儋石清苦異常

自少至耄好學不倦著書一百餘卷多心得

實踐之言近因時事日棘每以

聖主過於憂勞為慮此次所寄摺稿臣審為唐鑑

親筆字畫恭謹詞意肫摯以八十有四之年

當一息僅存之候猶復瞻懷

君國洵屬神明不亂忠愛可風可否籲懇

天恩俯念前太常寺卿唐鑑宿學忠敬

特旨賜諡出自

聖主之鴻施所有代遞唐鑑遺摺緣由附驛馳陳

伏乞

皇上聖鑒訓示謹

奏

皇清誥授通奉大夫二品銜太常寺卿諡確慎唐公墓志銘

公諱鑑號鏡海唐氏先世自江西豐城徙居湖南之善化四傳至諱煥者以舉人官至山東平度州知州公之祖也生子仲冕以進士即用知縣官至陝西布政使公之父也平度君以子貴

誥贈通奉大夫配李氏譚氏俱

封夫人譚夫人沒葬於山東之肥城布政君及配甯夫人皆踵葬肥城公以父命徙籍山東故又爲肥城人焉少而邁異精勤嗜學如渴以廩生入賞爲臨湘縣訓導嘉慶十二年舉於鄉十四年成進士改翰林院庶吉士又二年授職檢討又六年補浙江道監察御史充甲戌科會試同考官戊寅科順天鄉試同考官坐論淮鹽引地一疏更議鑄級以六部員外郎降補會

宣宗登極詔中外大臣各舉所知諸城劉文恭公鏗之薦公由是有廣西知府之

命厥後再爲平樂府知府一爲安徽徽甯池太廣道量移江安十府糧道拜山西按察使遷貴州按察使擢浙江布政使遷江甯布政使敷歷於外蓋二十年其守平樂也亭平民搖之獄而解其仇屢磔劇盜境內肅然時布政君解組東歸僑居金陵公聞母病卽引疾去官省親江南既遭內外之艱皆北葬肥城廬墓讀禮服闋以例仍發廣西再守平樂道光十二年廣東湖南生搖爲亂公出防邊圍內譏奸宄往來富川賀縣安撫熟搖獸擾而

兒畜之設立五原學舍延師教讀羣犛大悅擒郡中煽亂者譚于先等十餘人立斬以徇而黃其脅從千餘火其名籍一無所問其按察貴州也平反疑獄歸美令長曰非吾能正之某縣君來省自易之耳其在江甯拯災修廢百度畢張時總督陶文毅公澍寢疾公代行使院政事文牘如山賓僚填咽味爽而勤職丙夜而不休忘寢輟餐形神交瘁而言者乃劾其多病近藥廢閣公事又雜撫他端以相訾毀

朝廷遣使者按問率無左驗

宣宗知公端謹一切弗論忌者或憚其方嚴未幾內召爲太常寺卿道光二十年四月也公潛研性道宗尙洛閩諸賢所至以是敕其躬亦以是牘於人時時論著以垂於後在翰林時著有朱子年譜考異省身日課畿輔水利等書在廣西著讀易反身錄居喪著讀禮小事記官平樂時延納人士入署親與講授設立義塾誨誘寒賤官貴州時亦如之官江甯亦如之及入爲九卿又著易牖學案小識等書扶掖賢俊倡導正學時如今相國倭仁良峯侍郎吳廷棟竹如侍御寶坤蘭泉何文貞公桂珍輩皆從公考德問業國藩亦追陪几杖商榷古今觀其陋室危坐精思力踐年近七十斯須必敬蓋先儒堅苦者亞時賢殆不逮也已而致仕南歸主講金陵書院

文宗踐阼有

詔召公赴闕凡進對十有五次中外利弊無所不

馨

諭旨以其力陳衰老不復強之服官令還江南矜式多士公至金陵學徒益盛以賊犯湖南急欲歸展先塋咸豐三年乃自浙還湘卜居於甯鄉之善嶺山深衣疏食泊然自怡晚歲著讀易識編次朱子全集別爲義例以發紫陽之蘊十一年辛酉正月十八日疾卒春秋八十有四其家函封遺疏郵寄東流軍中國藩以聞

天子軫悼予謚確慎配王氏楊氏皆

封夫人前卒無子以弟子爾藻嗣女四人適某某孫男三人祖植祖培祖澍孫女三人是年六月十三日葬於甯鄉四都橫坑又八年國藩始追爲之銘銘曰

俗學徇時行與名釣孰捐其華而練其要唐公翼翼與世殊趨懼明戒旦篤信程朱有譏其隘或諷以迂浩然不顧履我康衢

顯皇初政詔徵國老造膝前陳嘉謨要道願致吾君上躋軒昊進退以禮斂茲宏抱宦遊所至我求童蒙晚居京國羣彥景從何才不育有金皆鎔以善華善偕之大同播此芬韻昭示無窮

誥授光祿大夫太子太保武英殿大學士直隸總督一等毅勇侯湘鄉曾國藩譔

先正事略

李元度

唐先生鑑字鏡海陝西布政使仲冕子也嘉慶十四年進士由檢討授御史劾武陵令顧煥圻貪劣狀一時稱快出知平樂府盡除陋規不以一錢自污創立搖疆義塾陋俗丕變遷安徽徽寧池太廣道置臺胥於法累遷江甯布政使入爲太常卿海疆事起疏劾總督琦善耆英等直聲震天下以老告歸咸豐元年

文宗下詔求賢

召赴闕奏對稱

旨辭以老不能任職

優詔加二品銜命回江南主書院講席矜式後學十一年卒

特旨予諡生平力崇正學闢陽明不爲調停兩可之說著學案小識以示宗旨又著畿輔水利書

召對時曾以進呈

詔嘉納焉

皇清誥授資政大夫 特旨賜諡確慎二品卿銜

太常寺卿唐公鏡海府君行述

嗚呼痛哉昔年 府君服官中外 雖隨任讀

書而年幼無識於 府君之道德政事文章不能

詳述萬分之一也然又恐嘉言懿行久遠無傳故

自 稍長以來聞見於晨昏定省時者一一記

憶不敢忘 雖聞昧敢不於昏迷創痛中和淚

濡墨敬陳梗概哉 府君諱鑑字栗生號敬楷又

號鏡海先世江西豐城縣籍自明永樂中榮琛公

始遷善化之白田鋪僑居數世隆萬間與公徙田

心橋始有廬墓明末兵燹僅存三世祖信甫公生

子五爲五大房長房即 府君也 高祖公錫公

諱啓科 誥贈通奉大夫 妣氏劉 贈夫人

曾祖宗周公諱學文國學生 祖堯章公諱煥由

廩膳生中乾隆辛酉科舉人部選山東平陰縣知

縣調昌邑縣署平度州知州 敕授儒林郎平陰

士民公舉入祠名宦均以道光元年 先大父官

福建按察使 誥贈通議大夫二年遷陝西布政

使 晉贈通奉大夫 曾祖妣氏彭 祖妣氏

均 贈淑人 晉贈夫人 考陶山公諱仲冕邑

庠生中乾隆甲午科舉人癸丑科進士江蘇即用

知縣歷官至陝西布政使三權陝西巡撫 誥授

通奉大夫海州士民公舉入名宦祠道光二十五

年以 府君官太常寺卿加二級 誥贈資政大

夫 妣氏甯 誥贈夫人 府君兄弟三人 府

君爲伯 仲父紫玖公諱鎮浙江候補鹽運使司

副使 本生父竹泉公諱鏡甘肅涇州直隸州知

州皆先卒 府君生而穎異六歲入塾讀書聲清

朗徹戶外十二讀綱鑑每遇一事必發一論 先

大父見之謂年幼不得妄議古人而心喜其有卓

識十五應童子試屢列前茅嘉慶己未補弟子員

庚申食廩餼甲子科應京兆試薦未得雋援例選

岳州臨湘縣學訓導丁卯登賢書己巳成進士

欽點庶常辛未散館授職檢討充 國史館協修

嗣充甲戌會試戊寅順天鄉試同考官兩次得人

及薦而未售者如陳芝楣制軍趙述園方伯松秀

峯都護鄂松亭水部其最著者也京都供職日與

戚蓉臺賀藕耕陳午橋賀蔗農諸年伯以理學相

切磋以經濟相勸勉嘗謂畿輔水利久廢不舉國

家生財之道莫此爲善因採擇古書咨詢利弊並

察訪直隸經河緯河東潞西潞南泊北泊古今興

廢一切形勢無不了然胸次因著畿輔水利一書

府君平居和易近人無疾言厲色樂成人笑而

好施予自官檢討後施以俸餘歲遞增其數意猶

若有歉於人者丁丑遷浙江道監察御史己卯充

會試監察御史 府君日思盡職報國封章屢上

有吏部豫東不集選法不公疏劾湖南巡撫某保

薦貪酷某知縣疏請復日講疏請復淮鹽地段衡

永郴桂仍食粵鹽疏其淮鹽一疏以紛更格於部

議奉 旨以六部員外郎改補辛巳以廢員引

見三月簡放廣西遺缺知府到省趙笛樓中丞奏

補平樂府知府平樂素多盜民刁梗好訟履任後

嚴緝捕清積讞不數月盜悉平案無留牘合縣久懸之案皆一一清結並周歷各屬勤求民隱戴星而出戴星而入秉燭治民事至夜半不得少休或一日一飯或日晡不得晨餐上憲知府君善聽斷凡外府州縣難結之案及部控上控之疑難者皆調省清理甲申因先大母患疾遂告假歸養是年九月丁內艱大父以曾祖母卜葬山東泰安府肥城縣之陶山命奉祖母柩附葬并命身後合葬府君旋遵命改籍山東肥城以便奉歲時祭祀廬墓三年口不茹葷事事求合古禮因著讀禮小事記前後兩編是時何文安公視學山左賀藕耕年伯開藩濟南聘府君主講泰安書院丙戌冬服闋回江南先大父以受恩深重欲令府君復出而府君以三年守制山左定省久疏大父又年逾七旬不忍遠離膝下仍乞養侍奉丁亥丁大父艱枕塊寢苦哀毀盡禮是年冬扶櫬隨漕艘至肥城卜葬於平陰縣界之安子山仍主講泰安書院并於肥城澗北山莊設義學以教鄉人之無力讀書者束脩膏火皆於墓田祭祀之餘出焉己丑服闋進京引見分發廣西坐補原缺到省祁竹溪中丞委署梧州桂林二府事旋奏補平樂府到任後見文廟考棚歲久傾頽均爲倡捐修葺并捐廉修理書院增其膏火人文日盛一切陋規悉與革除公事輒捐廉以倡辦愛民潔己不名一錢壬辰值搖匪趙金龍盤成華先後滋事生搖熟搖一時蠢動府君効力戎行防堵各

屬自春徂冬莫敢稍懈夫馬往來自備資斧並盤獲天地會首譚如仙何敦厚皆置之法是時二人各有匪徒千餘約於某日起事富川縣城紅布幾爲買盡府君訪察連夜往擒殲厥渠魁脅從罔治並燒燬仇讐冊籍遂爾寢事賀縣搖人有響應消息因仿于清端之事輕車減從親往撫之搖洞始聞府君至有謀聚衆拒捕者迨見騶從來臨並無兵弁相隨無不爭前恐後羣相迎接並訴其平日爲蠹役科派營兵逼索之苦府君面許懲辦賞以銀牌布疋勸其安分守法讀書知理羣搖欣欣樂從出具永不滋事甘結平樂七屬之生靈得安然無恙者皆府君之力也意欲照湖南各廳章程奏請添設搖童學額因廬厚山制軍祁竹溪中丞明保送部引見未及詳請後府君引病告歸猶以搖學未成爲歉常謂不孝曰搖亦人也以人視搖則搖易治以搖視搖則搖難馴人但知懲搖以重民不知撫搖正所以安民也假使官斯土者凡遇民搖械鬥之案平情辦理何至仇殺釀成事端著有平搖紀略一書板存金陵毀於兵燹離任入都之日身無長物行李蕭然官紳士民無不攀留泣下去後士民爲建生祠祀之不朽文廟書院碑記猶存途次卽奉旨簡放安徽甯池太廣德等處兵備道是缺兼管鈔關向有蠹書趙士孝從中包攬把持不獨國課空虛商賈裹足卽凡歷任官無不受其累府君偵知按律懲辦來往商旅咸頌威德甲午陶文毅公奏調江安徽甯

池太廬鳳淮揚十府糧儲道 府君察知水手刁悍親定查禁水手滋事章程四則並稟十字河水手撈沙不便由均載在文集丙申冬奉 旨補授山西按察使途次調補貴州入覲 召對三次隨即到任貴州民苗雜處械鬥之案最多每年秋審不下二百餘起 府君悉心推測平反必得其情情實者不使倖逃法網可矜者必曲諒其情總之毋枉毋縱各得其平並親書告示再三開導二年之間秋審入於情實者漸次以渺公餘之暇招本地士子入署讀書親爲講解並於臬署倡立義學四處戊戌奉 旨補授浙江布政使途次調補江蘇入覲 召對三次調補江甯到任後嚴察書吏弊竇概行革除並捐廉在藩署設立義學四處先是總督陶文毅公寢疾 府君代行院事己亥冬署督陳芝楣中丞卒於官 府君護理三江督事朝夕匪懈庶尹允諧庚子奉 旨內轉太常寺卿入都供職 召對一次太常衙門專司祭祀每年壇廟樹株向有去枯補新之例 府君以天壇重地國家風水所關不宜輕動遂自擬摺稿以後不准藉去枯株以防盜伐禁樹奏蒙 俞允是年值辦漢文則例 府君獨任校讐雖三伏炎暑必正衣冠勘閱恪恭將事不敢稍形懈怠每日公事既畢與阿良峯公何丹畦公寶蘭坡公講求性理體用之學篤信朱程力崇正學於陽明不爲調停之論一時學者翕然宗之著有學案小識一書辛丑廣東海氛不靖 府君奏廣東用兵宜擇威

名主將并奏海中攻剿當先據險要又奏有宜剿不宜和疏俱留中不報是以文集中未有錄稿癸卯甲辰乙巳每年均蒙 恩召見一次乙巳值日車翻傷肘冬季感受風寒時疾復發 府君以年近七旬肘疾未愈祭祀趨踰恐貽隕越遂奏請開缺回籍調理丙午春由山東掃墓歸湖湘原籍令不孝鄉試並爲 完娶丁未應兩江總督李石梧江蘇巡撫陸立夫兩先生之聘由楚至吳途次遇盜 府君宦遊數十載兩袖清風廉俸所餘非以助人卽以置書遭盜劫之後衆人方信 府君家無餘貲焉顛沛流離合家之人皆有不堪而府君毫不介意惟以失書爲恨故詩集中有失書數也行抵江南主講尊經書院辛亥歲爲咸豐

聖人御極之元年三月十八日內閣奉

上諭前任太常寺卿唐鑑現在江南主講書院著陸建瀛傳知該員迅速來京預備召見欽此 府君束裝北上於五月十九日行抵都門蒙 恩前召見十一次 垂詢所學及家世甚詳對 命恆逾數畧御前侍從頗以爲苦 府君年逾七十步履尙健面貌粹然 上問養身何術 府君謹以懲忿窒慾遷善改過對 上聞之肅然起敬並詢所著書 府君以編纂朱子學案未竟未卽呈 覽謹將畿輔水利備覽書繕疏奏交軍機處收存以備採用次日 召見蒙 恩嘉獎時值廣西洪楊倡亂 府君以安民爲主請設立民堡收養難民奏上發交廣西主兵者採擇施行親

王中有聞 府君名詣朝房問性道之要者 府君從容以答莫不數服孫芝房侍講題紅葉山房圖詩云諸王就問爭斂裾郎官久立勞持戟皆紀實也 上意嚮用甚殷適禮部侍郎缺出欲以簡畀 府君奏曰臣受

三朝養之恩涓埃未報豈敢性耽安逸自外生成惟是臣年老體弱大寒大暑易於生病誠恐有誤差使叩求南旋並奏明秋涼後出京得 旨俞允廷臣交章請留 陛辭之日 召見 上曰

與爾論學以朱子爲宗朕方讀朱子全書未得要領 府君對曰臣讀朱子全集別爲義例擬分格致誠正修齊治平爲八大案而以朱子之文分隸之則學者縷析條分了然心目 上再三稱善

論曰爾書出時必呈朕覽爲要越日 召對 上曰朕初御極學問爲先政事尤急與爾講論十餘次知爾所學之正蘊蓄甚宏閱歷甚久現在政事何者爲先對曰人才爲先 上因舉內而廷臣外而督撫曰此皆 先帝所簡拔人才當

在此中三問不對 上怒曰爾何輕視諸臣乎對曰非敢輕視此皆黼黻休明而有餘者也 上曰黼黻休明者非人才爾意云何對曰臣所謂

戡亂定治之才耳 上曰天下將有亂乎現廣西蠢動此小賊當不難平 府君叩頭曰臣受先帝殊恩兩次授廣西平樂府及知各府事歷任最久巡視最周廣西伏莽多年近始竊發疆臣苟能於粵境殲除國家之福若出粵境必蹂躪湘

鄂則東南半壁不堪設想矣 上大驚拂衣入內寮友多咎其言戇深慮不測而 府君處之泰然次蚤未明內傳 召見 上曰昨聞爾言夜

不能寐爾爲老臣必有所見若如爾言非得戡亂之才不可爾意中必有人試舉以備採用對曰如此人才寔不易得臣雖憂聖危明敬陳管見而戡

亂人才曾中寔無成竹不敢妄舉恐誤大事 上數問之對如前 上笑曰爾發此危論不舉人才朕惟爾是問也爾試細思之舉爾所知明日

再召對越日又 召見 上曰女得人焉爾乎對曰臣往年供職太常與諸友講學論治頗有才俊今出都十數年重來已晨星寥落矣才能戡亂寔難其人未敢輕舉以塞責 上曰爾無論京

外臣工草野側陋但能勝任舉爾所知 府君逡巡未對 上頻促之對曰臣再四思維惟卿貳中曾國藩一人差足勝任但學識有餘才智不足然能知人善任集思廣益能以衆人之才爲才遺

大投艱庶有濟也 上欣然嘉納 府君叩頭請退 上方目送之 府君復謁而奏曰臣尚有言方今文恬武嬉積習已久脫有戎事始事必難事變無常必有蹉跌惟在 聖主信之確任

之專耳國藩有定識定力沈毅過人必能貞固不搖屢敗克振若因失利或言者勦奏遽易他人則大難恐難平也 上領之 府君退朝廷臣多腹誹之時尙承平多所忌諱故皆溫樹不言外間鮮有知者八月二十日奉

上諭前經特召前任太常寺卿唐鑑來京疊次召對朕嘉其品學兼優器識安定欲令留京供職念該員年逾七旬力陳衰老若使勉強服官轉不足以示體恤唐鑑著加恩賞給二品卿銜仍回江南主講書院江南爲人文淵藪得老成碩學爲之教導俾後進有所矜式於士習民風當有裨益也欽此 府君當卽具摺謝 恩出都同鄉官皆送之郊外獨曾侍郎送之長辛店僮僕不忍遽別臨歧長跼而請曰有一言可以終身行之此別相待何年夫子其有以教我 府君沈思良久曰必有忍其乃有濟有容德乃大尙書中兩言君其三復而力行之畢生之事業在是矣乃揮淚而別 府君由水路回吳壬子陸立夫制軍延聘移席鍾山書院每逢課期無不親爲講解教誨而尤勉以躬行爲先是年秋逆匪竄擾湖湘鄉間祠墓多遭踐毀駟門長兄爾羨又以疾逝接到家書深爲痛悼急欲歸里祭掃而長江梗塞不通癸丑正月由蘇至浙意欲回楚豫章又復風鶴告警矣僑居武陵暫爲息足是時舟車所費囊橐俱空浙省告貸無門絕糧者數次 府君不改其常惟以著書爲樂甲寅春江左稍靖於正月起程行抵南昌適陸虹江鄧厚甫兩先生邀留主講白鹿洞書院冬間始抵長沙湘楚老成多已凋謝親戚鄰里遷徙一空滿目淒涼不堪回首復以城中頽敗烽燧頻驚徒增悲感年老難堪遂卜居甯鄉縣四都之衡丹嶺日事著述不與外人相周旋所著讀易反身錄易牖讀

易識四經拾遺省身日課朱子學案諸書皆以次告成己未冬季偶患腹疾服藥調理雖獲痊而步履艱難大非昔比然猶日以鉛槧爲事庚申十月腹疾復作延醫診治時愈時劇迨至辛酉正月十一日作會欽帥復函後論 不孝 曰我身受國家厚恩未能圖報具有遺摺將來懇會滌生代遞旋命掃除祖堂設香案朝服東向謝 天恩拜祖先四支無力扶掖歸臥榻上至十五日精神恍惚猶時強起危坐延至十八日辰時肅然端坐而逝 不孝 爾謹泣檢遺摺奏稿求黃月崖表兄設法專丁呈送江南會欽帥大營求其代遞欽帥於五月十八日由驛附奏六月初七日內閣奉 上諭前任太常寺卿唐鑑於咸豐元年來京朕見其品學兼優器識安定降旨賞給二品卿銜令其回江南主講書院茲據曾國藩奏該員病故據情代遞遺摺並請特旨賜諡等語唐鑑學問優深耄年不倦著加恩予諡該部知道欽此 不孝 爾謹接奉行知後當卽告墓以慰 先靈越某年奉 旨予諡確慎 府君生於乾隆戊戌年五月初七日未時卒於咸豐辛酉年正月十八日辰時享壽八十有四以咸豐十一年三月廿五日葬於甯鄉縣四都十區王坑新屋後山子山午向爲塋 府君元配王夫人繼配楊夫人均無出以 不孝 爾謹爲嗣 不孝 娶甯邑周公邦喜之女爲婦女五長適順天顧蘭徵次字江西周履方未嫁卒以孝女奉 旨建坊三適浙江咸貞四適善化賀瑗五適順天

周力圻孫男三祖植祖培祖澍孫女三均幼不幸
泣念府君一生精力少年研摩文史中年勤勞
民事乞假家居潛心理學生平著有平徭紀略二
卷畿輔水利備覽八卷學案小識十四卷朱子學
案八十卷讀易反身錄二卷易牖二卷讀易識二
卷讀禮小事記二卷四經拾遺四卷省身日課十
四卷名言卓行皆在人耳目可紀述者多謹具爵
里世系與生平梗概泣求當代
大人先生賜之碑銘表誄以垂不朽則世子孫
感激於無既矣

不孝

爾漢

率孫

祖植祖培祖澍

祖澍

祖澍

祖澍

謹述